

19/06/1999

Anwar bukan faktor rakyat tolak kerajaan BN

PEMIMPIN Umno dan parti komponen Barisan Nasional (BN) yakin isu pemecatan Datuk Seri Anwar Ibrahim, tidak akan menjadi faktor penting yang boleh menjejaskan sokongan rakyat kepada parti dan kerajaan.

Ini berikutan penjelasan Presiden Umno, Datuk Seri Dr Mahathir Mohamad, mengenai tindak tanduk bekas timbalannya itu untuk mengeruhkan kestabilan politik di negara ini.

Mereka yakin, dengan penjelasan Dr Mahathir itu akan mengukuhkan lagi perpaduan parti.

Naib Presiden Umno, Datuk Seri Najib Tun Razak, percaya penjelasan Dr Mahathir mengenai kes Anwar diterima setiap perwakilan dan akan disampaikan kepada semua ahli parti di seluruh negara.

"Dengan penjelasan Perdana Menteri itu, saya yakin kes Anwar tidak lagi menjadi faktor yang boleh menafikan kemenangan Umno dan BN pada pilihan raya akan datang," katanya.

Ketua Menteri Pulau Pinang, Tan Sri Dr Koh Tsu Koon, berkata dengan menjelaskan isu pemecatan Anwar, sokongan dan keyakinan anggota parti terhadap kewibawaan Umno kian meningkat.

Beliau yang juga Naib Presiden Parti Gerakan berkata, faktor Anwar juga tidak menjadi punca yang menyebabkan kedudukan Umno goyah dalam menghadapi persiapan pilihan raya akan datang.

"Berdasarkan pemerhatian saya, terutama di Pulau Pinang, isu Anwar tidak lagi menjadi isu besar yang boleh menggugat kewibawaan Umno dan kerajaan BN," katanya.

Menteri Besar Perlis, Datuk Seri Shahidan Kassim, berkata penjelasan Presiden Umno secara berterus terang dan terbuka diterima baik seluruh perwakilan.

"Apa yang penting semua orang memahami kes ini. Sebelum ini belum ada orang yang dapat memberi penerangan sesuai tetapi presiden berjaya memberi penjelasan tepat," katanya.

Perkara utama ialah Dr Mahathir menegaskan beliau sebenarnya boleh memecat bekas Timbalan Perdana Menteri itu dengan alasan mudah tetapi menggunakan isu moral supaya dapat mempertahankan tindakannya.

Menteri Besar Johor, Datuk Abdul Ghani Othman, berkata ahli Umno dan rakyat harus percaya tindakan Presiden Umno memecat Anwar bukanlah atas kepentingan peribadi tetapi demi menjaga maruah bangsa dan negara.

"Beliau sudah menerangkan dengan jelas.. tiada sebab beliau terbabit dengan konspirasi seperti yang didakwa sesetengah pihak. Pemecatan Anwar adalah untuk kepentingan negara," katanya.

Abdul Ghani berkata, pendedahan Dr Mahathir mengenai isu Anwar pada perhimpunan kali ini bukanlah untuk mempertahankan dirinya sendiri tetapi untuk memberi penjelasan secara terus kepada semua ahli dan rakyat keseluruhannya.

Bekas Presiden Parti Semangat 46 (S46), Tengku Razaleigh Hamzah, berkata penjelasan Dr Mahathir mengenai isu pemecatan bekas timbalannya itu adalah tepat bagi menghilangkan keraguan dan keresahan yang menyelubungi ahli Umno, terutama di peringkat akar umbi.

"Melalui penerangan hari ini, saya percaya keresahan di kalangan ahli parti akan dapat dikurangkan. Ini semua bertujuan untuk mengeratkan kembali ahli Umno dalam satu keluarga," katanya.

Menurutnya, Umno tidak boleh mengetepikan faktor parti turut dikelilingi musuh yang mahu memecah-belahkah parti, orang Melayu dan kepimpinan